

# Mamamili wangka julyjujanu

*Julyjuminyirri Mama ngarnawarrapurlukalu palyarnu  
ngarnka, parnalurrju*

Julyjujanu 1:1 – 2:3

## Karrpu kuju nyinangu

*Julyjujanu 1:1-5*

Julyjuminyirri Mama ngarnawarrapurlukalu palyarnu ngarnka, parnalurrju. Palunyangka parna nyinapayi puurra, murltuminyirri, kalyuwiyaju ngarripayi. Mungalulu juturnu kalyungka. Kurrurnpa kunyjunyu Mamamili parra yankupayi wangalyuru, ngarnawarra kalyungka. Palunyangka Mama ngarnawarrapurluka wangkangu. Wajarnu palulu, “Rantala!” Kayila rantarnuka raayanu. Jampa Mamalu nyangu rantanya, pukurlarringura. Palunyajanupulanya lalapungu rantanya jakamu munga. Palunyajanu Mamalu yinijunu rantanya “karrpu”. Kayila yinijunu munga “mungajarra”. Yuu, rukarringu, kuju karrpu pakirringu. Yungunpakarnu.

## Karrpu kujupangka ngarnka yutirringu

*Julyjujanu 1:6-8*

Kalyu ngarripayi parlparri, kalyuwapayi. Palunyajanu Mamalu wajarnu, “Yutirriwa ngarnka! Kalyu lalapuwa!” Jilanyangulyu Mamalu palyarnu ngarnka. Palunyajanupulanya

ngarnkalu lalapungu kalyu. Kalyu karlkinpa ngarringu ngarnawarra munkarra. Karlkinpa kalyu ngarripayi kaninyjarra. Palunyajanu Mamalu yinijunu kalyu ngarnawarra, "ngarnka". Yuu, palunyajanu rukarringu, kujupa karrpu pakirringu. Yungunpakarnu.

### Karrpu kujupa parna yutirringu, warta pakara wanarnu

*Julyjujanu 1:9-13*

Palunyangkara Mamalu wajarnu kalyuku, "Wayila kujukarti, kujungkarriakun!" Kayilara wajarnu parnaku, "Miralarri!" Palunyajanu yiltangulyu parna yutirringu. Palunyajanu Mamalu yinijunu parna, "parna". Kayila yinijunu kalyunga kujungkarrynjanga, "kujungurru". Palunyajanu Mamalu parra nyanguka pukurlarringu. Kayila wajarnu, "Kunyjunyuminiryi." Palunyajanu Mamalu wajarnu, "Pakalaya wartakaja parnajanu nyaa nyirrinyirri! Karlkinyurra pakalku wartakaja wilykiwintikaja, yungkalpintiwintikaja. Karlkinyurra pakalku wartakaja mirrkawintikaja."

Palunyangka yiltangulyu, parnajanuya wartakaja pakara wanarnu, nyaa nyirrinyirri. Pakarnuya wartakaja wilykiwintikaja, yungkalpintiwintikaja. Ngapiyuruya?, paruyuru, yuwinyiyuru. Jampa wilyki parujanu wartajanu punkara kurrungu parnangka, wartayila paru pakarnu. Mirta kujupa warta, paki, parungulyu. Jilanyaya yurlupirti nyinani wartakaja, wilykiwintikaja. Yuu, witukaya pakarnu wartakaja mirrkawintikaja. Ngapiyuruya?, wamurlayuru, jawirliyuru. Ngaakajaluya mirrkakajalu kanyirni wilyki ngururrpa. Jampa wilyki wamurlajanu mirrkajanu punkara kurrungu, parnangka. Wartayila wamurla pakarnu. Mirta kujupa warta, paki, wamurlangulyu. Jilanyaya yurlupirti nyinani wartakaja, mirrkawintikaja, yuu.

Palunyajanu Mamalu parra nyanguka pukurlarringu. Kayila wajarnu, "Kunyjunyuminiryi." Yuu, palunyajanu rukarringu, kujupa karrpu pakirringu. Yungunpakarnu.

### Karrpu kujupa jirntukamu wirlarra yutirringu

*Julyjujanu 1:14-19*

Palunyajanu Mamalu wajarnu, "Jirntu, yutirriwa ngarnkangka! Wirlarra, yutirriwa ngarnkangka! Kurtalyakaja, yutirriwaya ngarnkangka!" Kayilara wajarnu jirntuku, "Nyinaran karrpupintiwiyaju." Wajarnujanampa wirlarrakamu kurtalyakajaku, "Nyinaranyurra mungajarrapintikajawiyaju. Nyinakunyurra ngarnkapintikaja ngarnkangka wulungulyu. Jampanyurranya nyaku martukajalu ngarnkapintikaja, kulilkuya karrpu, mungajarra, wantajarra, yalijarra. Jilanyaya kulilku. Yuu, nyinakunyurra ngarnkangka. Kanyurra parra pirrpalku parnakarti." Palunyajanu yiltangulyu. Yutirriraya parra pirrpalku parnakarti.

Yuu, Mamalupulanya ngapirnu jirntukamu wirlarra. Kujarrangulyupula maju kujarra. Majujaranga palulu ngapirnu junu, rantalkuraku, karrpungkawiyaju. Kujupajaranga julijaranga palulu ngapirnu junu, rantalkuraku, mungangkawiyaju. Kajananya Mamalu ngapirnu junu kurtalyakaja, ngarnkawana, yuu. Mamalujananya yarnnga junu ngarnkangka, parra pirrpalkurakuya parnakarti. Jirntunga karrpupinti, parra pirrpalku parnakarti karrpukurluiwyaju. Wirlarrakamuya kurtalyakaja mungajarrapintikaja, parra pirrpalku parnakarti mungangkawiyaju. Jampajananya Mamalu nyangu, pukurlarringujanampa. Wajarnuyila, "Kunyjunyuminiryi." Yuu, palunyajanu rukarringu, kujupa karrpu pakirringu. Yungunpakarnu.

### Karrpu kujupa kuka kalyukarrayijakamu turru yutirringu

*Julyjujanu 1:20-23*

Palunyajanu Mamalu wajarnu, "Kalyukarrayijakaja, yutirriwaya kalyungka! Yarnngakuyarraya yutirriwa!" Kayila wajarnu, "Turrukaja, yutirriwaya! Kaya parra parrikala ngarnawarra!" Yuu, yiltangulyu. Mama ngarnawarrapurlukalujananya ngapirnu kalyukarrayijakaja,

nyaa nyirrinyirri, majukamu juku. Mirtajananya kujunkujun ngapirnu, paki, yarnngangulyujananya ngapirnu. Kajananya ngapirnu turrukaja nyaa nyirrinyirri. Jampajananya Mama ngarnawarrapurlukalu nyangu, pukurlarringujanampa. Wajarnuyila, "Kunyjunyuminyirri."

Palunyangkajanampa Mama ngarnawarrapurlukalu wajarnu, "Ngampurr kanyinmalparnanyurranya." Kajanampa wajarnu kalyukarrayijakaju, "Wululuya nyukapungama. Japukajajananyurra kanyinmalpa. Kanyurra yarnngarriku wanalku kalyungka. Yuu, nyinakunyurra kujungurrungka, karruwananalurrju." Kajanampa Mama ngarnawarrapurlukalu wajarnu turrukajaku, "Wululuya nyukapungama! Kanyurra yarnngarriku wanalku." Yuu, palunyajanu rukarringu, kujupa karrpu pakirringu. Yungunpakarnu.

### **Karrpu kujupa kuka parnawanaya yutirringu, ka martu ngapirnu**

*Julyujujanu 1:24-31*

Palunyajanu Mamalu wajarnu, "Kukakaja, miralarriwaya! Yarnngakuyarra yutirriwa! Nyaa nyirrinyirrinyurra nyinaku parnawana." Palunyangkaya yiltangulyu kukakaja yutirringu. Mamalujananya ngapirnu kukakaja, purnujanukaja. Nyaa nyirrinyirriya nyinapayi purnuwana. Kajananya ngapirnu kukakaja, parrikijanukaja. Nyaa nyirrinyirriya nyinapayi parrikiwana. Yuu, Mamalujananya ngapirnu kuwiykaja nyaa nyirrinyirri. Jampajananya Mamalu nyangu kukakaja yarnnga, pukurlarringujanampa. Wajarnuyila, "Kunyjunyuminyirri."

Palunyajanu Mamalu wajarnu, "Karu, ngapilkurarnajananya martukaja, ngayuyuruya nyinaku. Kajanampaya nyinaku maaja ngaangka parnangka. Maajajanampaya nyinaku kalyukarrayijaku. Kajanampaya nyinaku maaja turrukajaku. Maajajanampaya nyinaku kuwiykajaku yarnngaku. Yuu, maajajanampaya nyinaku." Jilanyangulyu wajarnu Mamalu. Palunyajanupulanya Mamalu ngapirnu martu kujarra. Yuu, ngapirnupulanya yirnakamu wanti. Mamalupulanya ngapirnu palunyayuru kujarra walyjayuru kujarra. Yuu, Mamayurungulyupula martu kujarra nyinapayi. Yirnakamupula wanti nyinapayi. Jampapulanya ngapirnu yirnakamu wanti.

Mamalupulampa wajarnu, "Ngampurr kanyinmalparnaptula wululu, yuu. Kanyilkujananyapulan ngankalku ngulyikaja yarnnga. Kanyurra yarnngarriku martukaja nyuntu kujarrakamu marlajanukaja nyuntu kujarramilikaja. Parranyurra yanku nyinaku yinta kujarra yintangka. Kanyurra nyinamalpa maaja ngaangka parnangka. Nyinakujanampanyurra maaja kalyukarrayijaku. Nyinakujanampanyurra maaja turrukajaku. Nyinakujanampanyurra maaja kuwiykajaku yarnngaku. Yuu, maajajanampayurra nyinaku.

"Ngaanya kujupa wangka. Yungkunirnanyurranya

mirrka, ngalkuraku. Yuu, yungkunirnanyurranya wartakaja wilykiwintikaja yungkalpintiwintikaja nyaa nyirrinirri. Ngapiyuruya?, paruyuru, yuwinyjiyuru. Ngayulurnanyurranya yungkuni wartakaja mirrkawintikaja. Ngapiyuruya?, wamurlayuru, jawirliyuru. Mirrkanyurrampaya nyinamalpa. Yungkunirnajanampa kukakaja mirrka wituka. Yukurijanampa mirrka nyinamalpa yarnngaku kukakajaku, turrukajakulurrju." Palunyangka yiltangulyu. Palunyajanujananya Mamalu parra nyangu yarnnga palyarnunyja, Mamanga pukurlarringu. Mukumukurringujanampa. Wajarnuyila, "Kunyjunyuminiryiringulyuya." Yuu, rukarringu, kujupa karrpu pakirringu. Yungunpakarnu.

### **Warrkamujanu Mamanga yurlta nyinangu**

*Julyjujanu 2:1-4*

Yuu, Mamalu ngapirnu ngarnka, parnalurru. Mamalujananya ngapirnu yarnnga ngarnkangka nyinanyjanpa. Palulujananya ngapirnu yarnnga parnangka nyinanyjanpa. Ngapirnajananya junu. Nyaa nyirriniryiringulyuya nyinapayi. Warrkamurripayi Mama ngarnawarrapurluka karrpuparaku karrpungka. Warrkamu palunyamili wiyanmanu Mamalunga. Jampa yungunpakarnu, Mamanga yurlta nyinangu. Mirta warrkamurringu jiingka karrpu kujupangka, paki, yurlta nyinangu, warrkamujanu Mamanga yurlta nyinangu. Ngapirnu Mamalu parnakamulurrju, karrpuparaku karrpungkalu. Ngapira yurlta nyinangu. Jiijanu Mamalu wajarnu wangka junu, "Ngaanya karrpu kujupa kujupaminyirri."

### **Yaatamukamupula Yiipi nyinapayi yintangka Yiitanja**

*Julyjujanu 2:25 – 3:24*

### **Jilalulu wantingka muunpungu**

*Julyjujanu 2:25 – 3:6*

Nyupararrapula nyinapayi. Nyinapayipula nyimparraparni, mirtangkupula kurntarripayi, paki. Mamalujananya palyarnu kuwiykaja. Kujuyla palyarnu yalyjirrpa, yalyjirrminyirri, jilangurninyijinga. Yanulu jila wantikarti. Kara japiro, "Kaji yulta? Kajinpulampa Mamalu wajarnu?, 'Mirtanpula ngalkura mirrkakaja wartajanu.'" Wantilura wajarnu jilaku, "Mamalulimpaju wajarnu, 'Ngalkuranpula mirrka karlkijanu wartajanu. Kuju warta yikini ngaangka. Kutungkangulyu yikini. Mirtanpula ngalkura mirrka jijanu wartajanu, paki, junkuranpula.' Yuu, jampaliju pampulku mirrka wartangka jiingga, miturrikuliju."

Jilalura wajarnu wantiku, "Ngala! Mirtan miturriku, paki." Wajarnura jilalu, "Jampan ngalku, kuranarrikun. Mamayururrikun, yuu. Mamalunpulampa mikulu wajarnu, 'Mirtanpula ngalkura'. Jampan ngalku jiinya mirrka, nintipukarrikun. Nintirrikuran kunyjunyuku. Nintirrikuran walykuku. Yuu, Mamayururrikun." Palunyangka wanti yanu wartakarti, nyangu mirrka wartangka. Mirrka wartangka wiliyikipayi. Jampa mirrka nyangu, wajarnu wantilu, "Kunyjunyu ngaanya mirrka. Kunyjunyumpa ngalkupinti." Palunyangka wurr ngangkulpayi, "Jamparna ngalku ngaanya mirrka, nintipukarrikurna". Palunyangkajananya mirrkakaja witarnuka kangu ngalangu. Kara kangu yungu kirtapartarnu. Yungura. Ngalanguyila kirtalu.

### **Ngalangupula kurntarringu**

*Julyjujanu 3:7*

Jampapula mirrka ngalangu, kuranarringupula. Nyangukangkupula wajarnu, "Nyimparraparnili nyinani."

Kangkupula kurntarringu. Palunyangkayilapula manu parrkakaja majukaja. Kapula nyimparrarnu parrkajanu.

### Mamapulampa mirrangu

*Julyjujanu 3:8-13*

Palunyangkapula Mama ngangkulpayi jakarrpa. Maaja maju ngarnawarrapurluka parra yankupayi yukartu yaltayaltangka yintawana. Palunyangkalurapula Mamangkamarra yanu kukurringu wartapuru. Mamara mirrangu yirnangurninyjiku, "Wanyjawan?" Palunyangkara yirnalu wajarnu Mamaku, "Kulirnurnanta jakarrpa, karna ngurlurringu nyimparraparni. Kukurringuyilarna wartapuru." Mamalura japiro yirnaku, "Nganalungku wajarnu?, 'Nyimparraparnin nyuntu, kurntarrikuran.'" Mamalura japiro, "Ngalangun mirrka wartajanu? Nyaamparnanta wajarnu? Wajarnurnangku, 'Mirtan ngalkura.'" Wajarnura Mamalu jilanya. Palunyangkara yirnalu wajarnu Mamaku, "Nyuntulujun junu wanti ngayuku. Karni palunyalungulyu mirrka manu yungu. Ngalanguyilarna." Palunyangkara Mamalu japiro wantiku, "Nyaapan ngapiro?" Palunyangkara wantilu wajarnu, "Jilalungulyurni muunpungu, pakirni kajarnu. Ngalanguyilarna mirrka."

### Mamalupulanya warrkirnu

*Julyjujanu 3:14-21*

Palunyangkara Mamalu jilaku wajarnu, "Putamanun nyuntulu. Karnanta watalku junku. Palunyajanun parra wayinmal nyurungka parnawana. Parra wayinmalpan wulu wirlangka. Wankalpin parnawana ngalya ngarrimalpa. Parnan ngalkumalpa. Mirtarnajananya watalku junku pulukukaja, paki. Mirtarnajananya watalku junku karlki kukakaja, paki, nyuntungurninyjirnanta watalku junku."

Palunyangkara Mamalu wajarnu jilaku, "Wirla rarrungkupula nyinamalpa nyuntukamu wanti ngaanya. Mirtangkunpula nyuntu kujarrawiyaju nyinaku wirla rarru, paki. Wulungkuya nyinaku wirla rarru jamukaja nyuntumilikajakamu jamukaja wantimilikaja marlajanukaja. Yuu, wirla rarrungkunyurra nyinamalpa wulu. Jampantaya wantimili marlajanukajalu nyaku, kantulkukantaya karljarrpungku katanyuku. Jampajananyan nyaku nyuntulu wantimili marlajanukaja, pajalkujananyan tartanyuku, yuu." Jilanyara wajarnu Mamalu jilaku. Palunyangkara Mamalu wajarnu wantiku, "Kanguran wangka jilaku nyuntulu. Palunyajanurnangku wajarni, 'Jampan jiji kanyilku, wilyjiwilyjirimbalpan. Nyuriran wangkamalpa nyupaku kirtaku nyuntumiliku, mirtaran parlanyarriku, paki. Palunyangkangku yirnanga nyupanga nyuntumilinga nyampali nyinamalpa.'"

Palunyangkalu wangkangu yirnajarangka Mama. Yininga yirna Yaatamu. Wajarnura Yaatamuku, "Nyuntululun kulirnu wantingka nyuntumilingka. Nyamparnangkupula wajarnu, 'Junkuranpula mirrka wartajanu kujujuanu, mirtanpula ngalkura.' Nyurilunpula ngalangu. Yuu, nyuntulun walykurnu, mirtajun wangka kangu, paki. Palunyajanu parna walykurriku. Mirrkakuranpula ngurrilku parnawana karrpu kujarra karrpungkalu, mirtanpula julyjuyurulu mirrka manku, paki. Wankalpinpula manarrarrimalpa, jamparanpula mirrka ngurrilku." Yiltangulyu parna walykurriku. Pakalkuya wartakaja walykukaja parnawana. Pakalkuya mangujikaja, jilkarnkajalurrju. Ngurirkuranpula mirrkaku manguijwana

jilkarnwana. Yuu, parranpula ngurrilku manku mirrka wupalmarta. Jamparanpula ngurrilku mirrkaku ngalkuraku, palunyangkanpulanya warrkulypa pakalku ngalyawana.

Yuu, Mamalura wajarnu yirnajaraku, "Ngayulurnanta palyarnu parnajanu. Jampan miturriku, marlakun parnarriku. Parnangulyun nyuntu." Palunyangka kirtangurninyilunga yinijunu wanti, "Yiipi". Wangkajanampa martukajaku nyarrartinkajaku. Wajarnila ngayurtinju, "wanka nyinani". Wajalpayiya nyarrartinju, "yiipi". Yuu, nyamirringulampa yiipinga yarnngaku marlajanuku. Nyamijanampa nyinangu martukajaku marlkarakajaku julyju. Nyurilampa nyinani nyami ngayurtinku kuwarri. Palunyangkapulanya Mamalu palyarnu yungu pulpupulpu wurna jirrji. Kangkupula junu.

### Mamalupulanya kaatanjanu yiyarnu

*Julyjujanu 3:22-24*

Palunyangka Mama ngarnawarrapurlukalu wajarnu, "Ngayuyurringu martu jiinya. Nintirringura kunyjunyuku. Nintirringura walyku. Kujupa warta mirrkawinti yikini ngaangka yintangka. Jampa yirnalu ngalku ngaajanu wartajanu, wulu nyinaku wanka, mirta miturriku. Yankura witalyjaku martulu jiinya mirrka. Palunyanurna marrkulku kurttingku ngaajanu yintajanu, yuu." Jilanya wajarnu Mamalu. Palunyangka wajarnu kurttingu yirna Mama ngarnawarrapurlukalu. Kurttingu yinta kujupakarti. Wulu yanu. Mamalu wajarnu kurttingu jiinya martu wartakajajanu yintajanu Yiitanjanu. Yininga yinta Yiitanpa. Parnangkayila jawara ngalkupayi mirrka martulu. Mamalu palyarnu martu parnajanu. Kayilara martulu jawalpayi parnangka mirrkaku, yuu. Mamalupulanya wajarnu kurttinguka ngurlurnu nyupararra yintajanu.

Palunyangkajananya Mamalu kurttingu palumilikaja wikarrukaja. Yanuya yintakarti Yiitankarti wikarrukaja, marrkulkurakujananya martukaja. Kakarrarajananya junu Mamalu yintawati wikarrukaja. Mulyawatijananya junu. Kayila Mamalu junu waru tilirrinya wartakajawati yintawati.

Warunga ngapiyuru?, nayipuyuru warlpukurruyuru. Palypalyarripayi. Warunga kujupakartirripayi. Jampapula marlakurrikijalu yintakarti nyupararra, purtupula kurrungku, paki. Mamalujananya junu wikarrukaja yintangka, warulurru. Mirtapula yanku marlaku martu kujarra jii kujarra, ngalkurakupula mirrka nyarrangka, paki. Pujupula ngalku mirrka wartajanu kujujuanu nyarrangka, wulupula nyinaku wanka, mirtapula miturriku. Palunyanupula mirta marlaku yanku jii kujarra martu kujarra yintakarti Yiitankarti, paki. Wirirlkartipula maa yanu.

## MAMAMILI WANGKA

Published by  
THE BIBLE SOCIETY IN AUSTRALIA  
Canberra